

երգել էր, եւ մարդկանց թափորների հետ սարսափը լեռներ էր ճեղքել եւ անցել:

Մի օր էլ ոռւսը եկել, ոտքը դրել էր երեւորդ հողի վրայ: Խաչը վստահութիւն էր ներշնչել: Կանայք բացել էին իրենց երեսը, լուացել մուրը, որով ծածկում էին իրենց գեղեցկութիւնը, ու Շամախին վերսկսել էր հիւսել, իր թանկարժէք եւ նուրբ մետաքսների վրայ թռչունների երգը եւ ծաղիկների երանդը:

Մեր տունը, մանրանկարների դունաւորումներով զարդարուն, կանանց ոսկէ քանդակների հետ միասին պահել էր ահաւոր փրուզումների յիշատակը:

Պարտեզի մէջ, կիսաքանդ պատեր, խոտերով ծածկուած հիւքեր կային, որոնք երկար պատմութիւններով կարող էին շատ գիշերներ լեցնել:

Տունը ձեռքէ ձեռք էր անցել:

Հայրս լեռներէն իջել էր, վերադնել տունը, իր ձին կապել գոմում եւ սուրը — մեծ, կռացած արծաթէ մի սուր — կախել պատին, իր անկողնի վերեւ:

Կովկասը շունչ էր առնում: Հայութիւնը բազմել էր երեք սկզբունքների վրայ. ոռւսը, եկեղեցին, դպրոցը:

Կիրակիները կամ տօներին, ոռուսաց եկեղեցու առջեւ, երբ զօրանց էր տեղի ունենում, հայրս իր բոլոր շքանշանները կախած, ձեռքիցս բռնում էր, եւ զօրքերի մօտ կանգ առնում:

Իր ծննդեան օրին եպիսկոպոսի նախագահութեամբ ճաշ էր տալիս:

Ձաւակները — ութ տարեկան հասակին տանում էր Մոսկուա, Պետերբուրգ կամ Թիֆլիս: Սովորեցէ՛ք:

Ու ամէն ինչ ալլեւս խաղաղ էր. բոլոր հարցերը, միանշամայն, իրենց յուժո՛ւմը առել էին:

Ի զուր, բարեկամները առաջարկում էին ձրի հողեր, նոր զարգացող Բագուի մէջ: Ծերունին լսել իսկ չէր ուզում: Ի զուր, երկրաչարժային ցնցումներ վայր էին նետել տան տանիքը, քանդել երրորդ յարկը եւ ապագայ վտանգների սպառնացող ուրուականը ման ածել:

Մարդը մնացել էր անսասան: Վերաշինել

էր տանիքը, կարգաւորել պարտէզը եւ վարդենիներին ջուր տուել:

Եւ ահա, գլուխը ճերմակ լաթերով փաթթուած, վիրաւորուած ասպետի ծանր քայլերով, նա ման էր դալիս սենեակից սենեակ եւ Խօղոֆորմի հոտ սփռում ամէն տեղ:

Ես վախում էի: Նախազգում էի մահը եւ սխալում պարտէզ:

* * *

Իր ննջարանը քառակուսի էր եւ մեծ: Լայն մահճակալ, պատի վրայ սուրը եւ զինուորականի կարմիր գլխարկ:

Մեռածների դեղնած լուսնկարներ: Հըսկայ մի բազկաթոռ եւ ընկուզնու լայնափոր մի պահարան:

Մենք այս սենեակը չէինք մտնում: Դուռը միշտ փակ էր: Հայրս ժամերով մնում էր այնտեղ մինակ, իր անցեալով, իր յիշատակներով եւ իր մահով:

Ամէն մարդ իր մահը տանում է իր մէջ: Կան նաեւ սենեակներ մահի համար պատրաստուած. անկիւններից քառակուսի շուքեր են իջնում, պատուհանի վարագոյրը ծանր է եւ մեծ, բազկաթոռը խոր է եւ ամէն ինչ համաչափ է:

Սենեակի դուռը մեծ էր եւ թոշած, մութ կարմիր գոյն ունէր: Ամրոցի դռների նման տխուր էր եւ ծանր:

Եւ ահա —

Դուռը միշտ փակ է: Ծառաները մտահոգ վազվզում են, դրսի զանգակը անդադար ղօղանջում է՝ մարդիկ են գալիս, բժիշկ, զինուորական հիւանդանոցի ծառայողներ: Մայրըս, ձեռքերը կրծքին սեղմած, գլուխը պատին է կրթնել: Մեծ եղբայրս լաց է լինում:

Դրան ետեւից բարձր խոպոցի ձայներ են գալիս: Օրհասականի մի խոպոց, որ լեցնում է ամբողջ տունը, սողում պատերի վրայից, բախում տանիքին, դուրս նետում պատուհանից դէպի պարտէզ:

Պառկել եմ դրան առջեւ, բարձր հեկեկում եմ: Փոքրիկ ձեռքերս սեղմել եմ դրան վրայ, ուզում եմ բաց անել, յետ կանչել, մաքառել անխուսափելիի դէմ: Յաղթել մահը տղայական քմահաճոյքով:

Դուռը փակ է: Մահը ներկայ է:

* * *